

太上洞玄靈寶天尊說濟苦經

天尊言 我窮乎無窮 極乎無極 我有七道之法 曰隱光 曰處光
 曰隱相 曰明隱 曰隱變 曰隱真 曰大德 歷化世間 觀察眾
 生 鍊其善惡 若男若女 能崇我法 精進信敬 行坐念道 恒持
 齋戒 著淨衣服 清潔之所 晝夜燒香 依時禮拜 供養十方 行
 道吟詠 讚歎諸聖 月直長齋 日日不闕 是人若遭病困 痛苦無
 療 及在繫閉 并諸婦人 臨產不分 當為誦此七道名字 咒請於
 我 我則尋聲 將徒眾乘空而來 徑赴是家 救拔病人 追其遊魂
 令還本身 則得除愈 若在牢獄厄難之中 亦令枷鎖解脫 若有
 婦人難產 便得易產 復於宅中有諸穢惡 浮遊病鬼 邪魔魍魎
 毒氣魑魅 無辜虛耗 驅除遠去 咒詛蠱道 妒忌赤口 遣還本主
 動作觸犯 受其過尤 我使侍童玉女 衛護其家 常居福慶 老
 命更延 少年益壽 諸善附體 萬惡冰消 一心信受 奉行自然
 得獲道真
 天尊言 我法行化 以為信者 勤身受持讀誦 如是道民 我恒圍
 衛 愍其鍊行 能敬道法 為除煩惱 終無枉橫 生無憂苦 死無

太上洞玄靈寶天尊說濟苦經

清微藏書閣

殃咎 去處無為 常樂善緣 獲福自然 超越升仙
 天尊言 我臣道士 是汝門師 受汝供養 為汝授法 轉讀經文
 過齋度戒 通傳我前 啟請精誠 我自知之 若不依法 我亦知之
 汝等道民 但好供養 勿有侮慢 謗生口業 生施有悔 死必無
 功 我當觀察 罪無兩主 直心取念 多施多獲 少施少得 造經
 造像 亦復如是 及能安立宮觀 坐我形像 幡花圍遶 然燈續明
 施力成就者 其功巍巍 計不可勝 時登善福 得入升仙
 天尊言 惟我先天地前 我獨有之 無生無滅 變易自然 有天有
 地 始有君民 我出經教 歷帝為師 復為天真大神 撫接蒼生
 東化碧落 南化炎明 西化大堂 北化鬱單 化緣既遍 遷還帝境
 濟度十方 皆來奉道 未覩因果 至心樂法 得入升仙
 一者 無極大道
 二者 無上正真道
 三者 無為太平清約大道
 天尊言 此經一卷 日誦三遍 稱我三寶 彰衛此人 令無怖畏
 若有罪犯 亦復除滅 汝等道民 若讀此經 口氣不淨 故汗不慎

未來染罪 穢濁之中 若欲讀誦 必當漱口潔淨 持心正念 求
男得男 求女得女 求長命得最安樂 衣食豐足 此經一卷 大有
神德 濟度生死 若男若女 抄寫受持 清淨安置 即宅舍安穩
男女昌熾 眾聖助衛 世人敬愛 富樂無為 福力之故 善行增廣
七世生天 法界有類 俱持斯福 信受奉行

太上洞玄靈寶天尊說濟苦經竟

天運辛卯年酉月正一天師清微弟子洪鼎堅羅大英恭錄彙編

鞠昕延複校

太上洞玄靈寶天尊說濟苦經

清微藏書閣